

Илҳом СОБИРОВ

**БАҶМАИ
БУЛИҶБ...**

Шеърлар



**“ФАРҶНА” НАШРИҲИ
НАЗОРАТ НУСХА**

«ФАРҶОНА» нашриёти
2012 йил

УДК: 821.512.133-1

КБК: 84. (5Ў) 7 - 926. 9908.
C74


Собиров, Илхом.

Бахтли бўлинг: шеърлар/ И.Собиров – Ф:
«Фарғона» нашриёти, 2012. – 32 б.

*Ошиқ юрак кўп нарсага қодир. Ҳатто муҳаббатига
жавоб қайтармаган суюқлисига бахт тилашга ҳам. Маз-
кур тўплам муаллифининг лирик қаҳрамони шундай кенг
қалбга эга. Қаламкашнинг дил изҳорларида ишқий оҳанглар
етақчилик қилади. Лекин бошқа одатий мавзулардаги, бир
қарашда анчайин содда шеърларда ҳам ўзгача ҳарорат,
дардчилик сезилиб туради.*

УДК: 821.512.133-1


КБК: 84. (5Ў) 7



ISBN 978-9943-349-26-1

© «ФАРҒОНА» нашриёти, 2012

© Илхом Собиров



HD 40638
0

ВАТАН

Сен мен учун жонимдан ортик,
Нурларингдан чароғон борлик,
Бахтим фақат ўзингга боғлик,
Монанди йўқ азиз ватаним,
Жанатмакон, гулгун чаманим.

Яратганнинг меҳри тушган юрт,
Дўстим, гардин кўзларингга сурт,
У тинч бўлса, кўнглимиз ҳам бут,
Монанди йўқ азиз ватаним,
Жанатмакон, гулгун чаманим.

Еткизолмас ёмонлар зиён,
Алпомишдай ўғиллар қалқон,
Кексалари дуода ҳар он,
Монанди йўқ азиз ватаним,
Жанатмакон, гулгун чаманим.

Дарёларинг шаркираб оқар,
Ҳаволаринг дилларга ёқар,
Дунё сенга ҳавасда боқар,
Монанди йўқ азиз ватаним,
Жанатмакон, гулгун чаманим.

Жамолингни очди истиқлол,
Мукаддасан, буюк, безавол,
Доим шундай гўзал бўлиб қол,
Монанди йўқ азиз ватаним,
Жанатмакон, гулгун чаманим.



ТИНЧЛИК МАДҲИ

Шаҳару қишлоқлар кундан-кун обод,
Кўз қувнар боғларнинг тароватидан.
Самоларда қушлар чарх урар озод,
Барчаси тинчликнинг шарофатидан.

Элим янги-янги зафарлар қучар,
Буюк келажакка бормоқда илдам.
Истикболи порлоқ режалар тузар,
Юртим аҳли яшар тотув ва бирдам.

Кексалар чин дилдан айтар шукрона,
Ёшлар нигоҳида ишонч, қатъият.
Шундай осойишта, бахтли замона,
Албатта ушалур ҳар яхши ният.

Тилимдан қўймасман тинчлик мадҳини,
Баралла куйлайман билмасдан ҳадик.
Ватандош, кел, англаб унинг қадрини,
Улуғ йўлда қўлни қўлга берайлик!..

ЯХШИЛАР

Заҳматлидир умр йўллари,
Гул, тиканли унгу суллари,
Адашсам гар. тутиб қўларим,
Менга мадад берар яхшилар.

Кузларимни ёшлаб гоҳо ғам,
Гаскин топа олмасам ҳечам,
Ойдин этиб қоронғу кечам,
Ҳолим сўраб келар яхшилар.

Етиб тақдир тайин этган вақт,
Манглайимдан ўпса омад, бахт,
Шундай хуррам кунларим албат
Чиндан қувнаб, қулар яхшилар.

Яхшиларга қўйдим мен ихлос,
Бу –қалбимнинг бойлигидир, рост,
Дунё томин, устунларга хос
Мангу тутиб турар яхшилар!



УСТОЗЛАРГА КУТЛОВ

Бошин силаб, севиб ҳар бир болани,
Илм бериб, танитган оқ-қорани,
Ҳатто ўрнин босган ота-онани,
Байрамингиз қутлуғ бўлсин, устозлар,
Йўлларингиз нурга тўлсин, устозлар.

Жавобини айтган, берсак не савол,
Эркалансак, сира олмаган малол,
Бизларни деб меҳнат қилдингиз ҳалол,
Байрамингиз қутлуғ бўлсин, устозлар,
Йўлларингиз нурга тўлсин, устозлар.

Камолимиз чин дилдан хоҳладингиз,
Кўзларимиз очди сабоқларингиз,
Улуғ, юксак номингиз оқладингиз,
Байрамингиз қутлуғ бўлсин, устозлар,
Йўлларингиз нурга тўлсин, устозлар.

Қабул айланг самимий изҳоримни,
Сизларга бахш этсам дейман боримни,
Мадҳингизда чертдим кўнгил торимни,
Байрамингиз қутлуғ бўлсин, устозлар,
Йўлларингиз нурга тўлсин, устозлар.

БОЛАЛИК

Болалик, бағрингга қайтгим келяпти,
Сенга дардларимни айтгим келяпти.

Юрган йўлларингдан юра олсайдим,
Терган гулларингдан тера олсайдим.

Ўйин завқи билан андармон эдинг,
Қанчалар беғубор, беармон эдинг.

Эртақлар тинглардинг чиндан ишониб,
Саволлар берардинг кўзларинг ёниб.

Покизе, нигоҳинг соғиндим жуда,
Лекин, не иложки, бари беҳуда.

Орамизга йиллар қўйдилар тўсиқ,
Сен-мен куйлаб бўлган энг нурли қўшиқ.

Гоҳо юрагимда қоласан янграб,
Тасалли топаман овозинг тинглаб.

Демак, ҳамроҳимсан менинг доимо,
Эй, болалик номли энг гўзал дунё...



ЭНДИ СИЗНИ...

Қолдирдингиз мени ҳижрон фаслида,
Азоб чекдим изғиринлар дастидан,
Сизда юрак йўқ экан, оҳ, аслида,
Энди сизни ўйлашдан ор этарман,
Кўчангизга йўлашдан ор этарман.

Ваъдасидан осонгина кечган қиз,
Бойваччанинг бойлигига учган қиз,
Ошиғинмас, мол-дунёни қучган қиз,
Энди сизни ўйлашдан ор этарман,
Унутмоққа азму қарор этарман.

Жигар-бағрим эзиб кетган бевафо,
Мағрур бошим эгиб кетган бевафо,
Дилга оғриқ экиб кетган бевафо,
Энди сизни ўйлашдан ор этарман,
Севганимни ҳатто инкор этарман.

Фақат бир кун излаб қолманг изимни,
Ярам битмас, оғритдингиз ичимни,
Бахтли бўлинг, буза кўрманг тинчимни,
Энди сизни ўйлашдан ор этарман,
Бир вафоли дилдорни ёр этарман...

БАХТЛИ БЎЛИНГ...

Дардларимга даво берар вақт,
Азобларим топар ниҳоя.
Бахтли бўлинг, сиз, гулим, фақат,
Менга шунинг ўзи кифоя...

Қанча йиллар ўтса-да, бироқ
Унутмасман жамолингизни.
Қалб уйимга этарман чирок
Сизнинг ойдин хаёлингизни.

Ҳеч ишонгим келмайди, наҳот
Эсламайсиз мени бир бора.
Қушлар каби, қоққанча қанот
Ўша кунлар қайтсайди зора...

Бефойдадир бу ўй, хомхаёл,
Орта қайтмас умр-бир дарё.
Не бўлса ҳам сиз топинг иқбол,
Кўнглим ичра шу бир муддао...



СЕВГИ ШАРТИ

Севги недир, севган билар,
Азобини чеккан билар.
Висол кутган юрагига
Ҳижрон ўқи теккан билар.

У тунлари айлаб бедор,
Жисму жонни этар бемор,
Тақдир кулиб боқмаса гар,
Қанчалаб оҳ урма, бекор.

Агар севгинг бўлмаса чин,
Синовларга чидаш қийин.
Сабр қилсанг, ёрнинг васли
Бир кун насиб этар, тайин.

Тўсиқларнинг енгар барин
Ошиқларнинг асл, марди.
Фидойилик, жасоратдир
Бу дунёда севги шарти.



КИМНИ КУТИБ ЯШАЯПСАН...

Ихтиёринг менга бермадинг нечун,
Юрагимда сира ечилмас тугун,
Билолмасдан доғман, энди сен бугун
Кимни кутиб яшаяпсан, эй дилдор?!

Қай осмонда қалб қушинг этар парвоз,
Ўзгани деб, наҳот, қиларсан пардоз,
Қани ўша сеҳр, карашмаю ноз,
Кимни кутиб яшаяпсан, эй дилдор?!

Кутмоқдаман, баҳорлар ўтиб борар,
Зилол сувли анҳорлар ўтиб борар,
Пайқамасман, дилдорлар ўтиб борар,
Кимни кутиб яшаяпсан, эй дилдор?!

Дардларимга даво топилса зора,
Севдим, аммо севилмадим, начора,
Бунга қандок чидайин мен бечора,
Кимни кутиб яшаяпсан, эй дилдор?!



ОРЗУ

Кўз олдимда юксак бир чўкки,
Истайманки, уни забт этсам,
Устозларнинг сабоғин уқиб,
Ёдда қолар сагрлар битсам.

Заҳматларни енгишга шайман,
Мавж уради қалбимда ҳавас.
Мен ҳаётни севиб яшайман,
Уни ёниб куйламай бўлмас.

Мафтун бўлиб сўзнинг сеҳрига,
Гулшанига қўйяпман қадам.
Лойик топса эл ўз меҳрига,
Мен-дунёда энг бахтли одам.

Қаламим, кел туйғуларимни
Қилақолгин равон ифода.
Тезроқ кучай орзуларимни,
Номим қолсин ёруғ дунёда...

ЁШСИЗ ДЕМАНГ...

Сизни севиб қолдим, десам гар,
Ҳали жуда ёшсиз-ку, деманг.
Тингламасдан сўзим, ёш бошим
Савдоларга гирифтор этманг.

Ёш бўлсам-да, бебош эмасман,
Қалбимдаги муҳаббтим чин.
Илпончингиз қозонмоқ учун
Алтинг, ахир, нелар қилайин.

Вужудимни қоплар аланга
Жамолингиз кўрганим захот.
Ёш умримни хазон этишдан
Кўркмайсизми заррача, наҳот?!

Ёшсиз, дея ўтказиб йиллар,
Охир қаддим дол этиб қўйманг.
Қабул қилинг дил изҳоримни,
Бўлди, етар, бағримни ўйманг...



БИР КУН...

Умид билан битаман мактуб,
Зор-интизор жавоб кутаман.
Қилолмайди хижронлар мағлуб,
Бир кун қўлингизни тутаман.

Сизга атаб тераман гуллар,
Қанча йўллар босиб ўтаман.
Ҳамроҳимдир гузал туйғулар,
Бир кун қўлингизни тутаман.

Банддан озод бўлган қуш каби
Қанот қоқиб қўкка етаман.
Оғир дамлар ўтар туш каби,
Бир кун қўлингизни тутаман.

Юзингизни эслатган ойни
Сирларимга ошно етаман.
Ёрим этиб сиз гулчиройни,
Бир кун қўлингизни тутаман.



ГУЛИМ

Гарчи ҳаёт номли боғдаман, гулим,
Сенга кўлим етмай, доғдаман, гулим,
Олис-олисларни этибсан макон,
Гўё сен кўкда, мен чоҳдаман, гулим.

Дунёда барчага севган гули ёр,
Менинг юрар йўлим эса тиканзор,
Тилагим, бошингдан баҳор кетмасин,
Мудом яшна, сўлиб қолмагин зинҳор.

Саболар сен ҳақда сўзлар ҳикоя,
Мен учун уларни тинглаш кифоя.
Армоним чўкмоқда қалбим тубига,
Бошимга булутлар ташлайди соя.

Ўзга гулга назар ташлагим келмас,
Ҳеч бири гулимдай мафтункор эмас,
Аммо унга сира кўлим етмайди,
Фирокда яшашга тоқатим етмас...



АНҲОР

Анҳор оқар ўйнаб, мавж уриб,
Сувида соч ювар мажнунтол.
Бундай ажиб тасвирни кўриб,
Мени олиб қочади хаёл.

Қачонлардир шу шўх анҳордай
Силар эдим унинг сочларин.
Бугун қисмат берган озордан
Анҳор бўлди кўзим ёшлари.

Шум янгалар ёр-ёр айтишиб,
Юрагимни эзиб кетдилар.
Аламимга минг алам қўшиб,
Мажнунтолим кесиб кетдилар.

Анҳор, мендай армонда қолма,
Ёмонлар кўп дунёда бешак.
Сочларини силашдан толма,
Мажнунтолинг асрагин сергак.

АХИР НЕЧУН ...

Ҳар бир ўтган дақиқа
 Титроқ солади дилга.
 Бугун ёшмиз, эртага
 Қоматимиз эгилган.
 Ортимизга қайтишга
 Барча йўллар беркилган.
 Ахир нечун одамга
 Умр қисқа берилган...

Йил кетидан йилларни
 Бир-бир кутиб оламиз.
 Кузни очиб-юмгунча
 Улғаяди боламиз.
 Ҳатто қанча ишларга
 Улгурмай ҳам қоламиз.
 Ахир нечун одамга
 Умр қисқа берилган...

Кўп ўйлаб, бу саволга
 Жавоб топдим ниҳоят.
 Ғанимат дамларимиз
 Юксак қадрлаб ғоят,
 Шошилмоқ, яхшиликни
 Қилмоқ керакдир одат.
 Шунинг учун одамга
 Умр қисқа берилган...

2013/18 А 489	Alisher Navoiy nomidagi O'zbekiston MK
------------------	--



ОНА-БОЛА СУХБАТИ

Ҳазил

– Кўзим қароғи, ўғлим,
Қамолингдан ўргилай.
Биргина ниятим бор,
Сенга тезрок тўй қилай.

– Мен розиман, онажон,
Қайтармасман сўзингиз.
Ўғлингизга муносиб
Қиз топингиз ўзингиз.

– Айт, қандай келин излай,
Юзлари ой қизними?
Ва ёки аслзода,
Таг-тугли, бой қизними?

– Гўзал, ширинсўз бўлсин,
Мол-давлати керакмас.
Яна қоп-қора сочи
Товонини ўпса бас.

– Ох, бугуннинг қизлари
Сочин қирқиб олган-ку.
Сен айтган сумбулсочлар
Эртақларда қолган-ку...

– Она, айтган қизимни
Қанча бўлса кутаман.
Агар у топилмаса
Уйланмасдан ўтаман...

ҚАРАМАСАНГ, ҚАРАТАМАН

Кўчамиздан ўтиб борар бир пари,
Мағрур қадам ташлаб, боқиб илгари,
Ҳатто бир бор назар қилмас биз сари,
Эй нозанин, бу нозларинг ажабдур,
Қарамасанг, қаратаман, қараб тур.

Атринг бўйи урилади димоққа,
Лаб бурасан, чоғлансам сўз демоққа,
Хоҳишинг йўқ ёнингга йўл бермоққа,
Эй нозанин, бу нозларинг ажабдур,
Қарамасанг, қаратаман, қараб тур.

Ахир, аён, кўнглингдан олганман жой,
Тушларингга ҳам кирарман, хойнаҳой,
Ёқарми ё бағрим ёниб, десам вой,
Эй нозанин, бу нозларинг ажабдур,
Қарамасанг, қаратаман, қараб тур.

Юрагимга энг буюк севги жодир,
Мендай ошиқ ҳар қандай ишга қодир,
Ниятимга шаксиз етаман охир,
Эй нозанин, бу нозларинг ажабдур,
Қарамасанг, қаратаман, қараб тур.



ЮРАК ҚОЛДИ

Имкон опмай, тақдирга кўнди,
Орзу-умид учқуни сўнди,
Ҳасратларга лиммо-ним тўлди,
Юрак қолди йиғлаб, бечора...

Биз кутган кун кўрсатмади юз,
Йўлларимиз қоплаб олди муз,
Порламади бахт номли юлдуз,
Юрак қолди йиғлаб, бечора...

Айирдилар бизни ёмонлар,
Ўртамизга солиб хижронлар,
Қанча ёниб, қилиб исёнлар,
Юрак қолди йиғлаб, бечора...

Лойиқ сўз йўқ бермоққа таскин,
Ҳаёт, ҳукминг бунчалар кескин,
Унутмоққа маҳкумми секин—
Юрак қолди йиғлаб, бечора...

МАРҒИЛОНЛИК ҚИЗЛАР

Марғилонлик кизлардан ой ҳам хусн талашар,
Сарвдек қадларига атлас кўйлак ярашар,
Ўтсалар кўчалардан, яшнаб кетар чор тараф,
Бўз йигитлар кўзлари қамашганча қарашар.

Қули гул моҳир чевар, уддабурун ҳар ишда,
Жўш уради ғайрати, саранжому саришта,
Ибоси, одобини таърифлашга тил ожиз,
Гўёки самолардан тушиб келган фаришта.

Онаю отасига жон ичра жон фарзанддир,
Униб-ўсган уйига бир гул каби пайванддир,
Пайти келиб ёрининг боғига кўчганда ҳам
Гўзал сабри туфайли толеи сарбаланддир.

Ўзбегим гўзалларин эғнида ёнар атлас,
Йигитларнинг кўксига аланга солар атлас,
То уни киярканлар Марғилоннинг қизлари,
Сеҳри, жилваси билан кўзларни олар атлас...



ДЎСТ ҲАҚИДА

Садоқатли дўст ҳам бир давлат,
Тақдирнинг энг улуғ туҳфаси.
Эй биродар, бошингга ҳеч вақт
Ёлғизликдек савдо тушмасин.

Дўстинг асра худди кўзингдай,
Тилагини сўзсиз эт бажо.
Баҳраманд қил нону тузингдан,
Ёрдамнингни аяма асло.

Заҳматлрга дуч келсанг ногоҳ,
У ҳам сенга беради нажот.
Қайтар дунё, дерлар, бўл огоҳ,
Яхшиликка бордир мукофот.

Ҳаёт ширин, гўзалдир дунё
Унинг меҳру диёнатидан.
Барчамизни асрасин Худо
Бевафо дўст хиёнатидан...



ДУНЁ ИШИ БИТМАС...

Дунё ўткинчи-ю, битмас ишлари,
Кунни кеч қиламиз елиб-югуриб.
Елдай учар йилнинг ёзи, кишлари,
Барча юмушга ҳам бўлмас улгуриб.

Ҳеч қачон, камимиз тўлди, демаймиз,
Ҳаёт жилвасига кўзимиз тўймас.
Энди тин оламан, бўлди, демаймиз,
Кўнгил неларнидир исташин қўймас.

Бир оғиз ширин сўз, эътибор кутиб
Атрофга жавдираб қоламиз гоҳо.
Меҳр бермоқликни, лекин, унутиб
Юрганимиз ўйлаб кўрмаймиз асло.

Бас энди, ғафлатдан уйғонгин, эй дил,
Дунё шу–барибир тугамас юмуш.
Кўпроқ савоб ишлар қилишга интил,
Ўтиб кетмасидан умр гўё туш...



БЕГОНА БЎЛДИКМИ...

Ой мисоли тўлдикми, айтинг,
Ёки гулдек сўлдикми, айтинг,
Йиғладикми, кулдикми, айтинг,
Биз бегона бўлдикми, айтинг.

Ўзга ёрга чалиб созингиз,
Сўйладингиз кўнгил розини из,
У эканми сизнинг мосингиз,
Биз бегона бўлдикми, айтинг.

Тақдир дедик, кўндик индамай,
Лекин юрак ҳар дам инграгай,
Фарёдини ким ҳам тинглагай,
Биз бегона бўлдикми, айтинг.

Сира қойил эмасман сизга,
Ваъдаси пуч, бағритош қизга,
Ачинмасдан ўз севгимизга,
Биз бегона бўлдикми, айтинг...

ОМАД БЕРСИН

Аримасин юзлардан нурли табассум, кулгу,
Тарк қилсин юракларни мангуга алам-қайгу,
Болдай ширин ошига тушмасин аччиқ оғу,
Бу дунёда ҳар кимнинг омадин берсин дейман.

Инсон ҳаётга келар фақатгина бир бора,
Аламдир, ташвишларга тополмай ўтса чора,
Тақдир фақат шодлик, бахт ато этсайди зора,
Бу дунёда ҳар кимнинг омадин берсин дейман.

Кўнгиллар ичра бисёр турфа хил орзу-ҳавас,
Ҳатто фурсат топилмас ростлаб олмоққа нафас,
Қай манзилга интилсак, унга ега олсак бас,
Бу дунёда ҳар кимнинг омадин берсин дейман.

Ором нелигин билмай омадимни изладим,
Умидим бор, албатта ёруғ бўлар қисматим,
Зотан ўзгаларга ҳам яхшиликлар истадим—
Бу дунёда ҳар кимнинг омадин берсин дейман.



ОҚШОМ

Оҳиста чўкди оқшом,
Ой нурын тўкди оқшом,
Сени эслатиб, қалбим
Чокини сўкди оқшом.

Юлдузларга боққанча,
Соғинч бағрим ёққанча,
Сассиз йиғларман, хаёл
Дарёсида оққанча.

Кўринмайди кўз ёшим,
Метин экан бардошим,
Яшаяпман, менга нур
Сочмаса-да қуёшим...

Жонимдан қилдинг безор,
Менда нима қасдинг бор,
Юзи ойдаи малакни
Оқшом, эслатма зинҳор...



ЎЗГАНИНГ ЧИРОҒИ

Япроқлар чангини ювади ёмғир,
Лекин юва олмас дилдан ғуборим.
Буни тан олмоқлик жудаям оғир,
Ҳузуримга кайтиб келмайди ёрим...

Қанча порламасин осмонда офтоб,
Бағрим иситолмас бир заррача ҳам.
Оташин ишқимга бермасдан жавоб,
Зарларга сотилди кўнгли муз санам.

Юзим силайверма, майин шаббода,
Таскин беролмайсан менга барибир.
Ғамимдай улуғ ғам йўқдир дунёда,
Силолмайман унинг сочларин ахир...

Чирок ёққан билан ичим ёришмас,
Қийнар ул гўзланинг мангу фироғи.
Ҳеч қачон мен томон ёғдуси тушмас,
У— энди ўзганинг ёнган чироғи....



КЎЗЛАРИДА ЁШ КЎРМАЙ...

Меҳру муҳаббатнинг боқий тимсоли,
Аёлдир ҳаётнинг кўрку жамоли.

Ҳар йили заминга қайтади такрор,
Унинг гулдай юзин соғиниб баҳор.

Борликни ўзига қаратади у,
Дунёнинг эртасин яратади у.

Қудратда тенгсиздир нозик қўллари,
Офтоб нуридан-да ёруғ ўйлари.

Қай бир юртди аёл этилса эъзоз,
Бу:оклик, юксаклик унга бўлар хос.

Асло кўзларида ёш кўрмай дейман,
Таърифини тилдан ҳеч қўймай дейман.

Аёлни бир умр қуйламоқ—аҳдим,
Бу мен учун шараф, энг олий бахтдир!



БАҲОР ЗАВҚИ

Эритиб муз, қорларни,
Тўлдириб анҳорларни,
Ювиб гард-озорларни,
Баҳор келди, қандай соз!
Олам янгиланди, рост!

Хуш ёқар офтоб нури,
Шўх қушларнинг чуғури,
Боғлар – кўнгил ҳузури,
Баҳор келди, қандай соз!
Олам янгиланди, рост!

Моҳир чевардир бирам,
Тўкиб ям-яшил гилам,
Борлиққа ёйди илдам,
Баҳор келди, қандай соз!
Олам янгиланди, рост!

Тошар завқу севинчим,
Йўқдир ҳаловат, тинчим,
Қабул қилиб ўтинчим,
Баҳор келди, қандай соз!
Мен ҳам янгиландим, рост!



КУЛИБ ТУРИБ

Ич-ичимдан чиқар ғалати титроқ,
Бировга сездирмай юраман бироқ,
Дардимни англамас ҳеч бир дўст-ўртоқ,
Чидайман барига жим кулиб туриб.

Ухлолмай, тўлғониб чиқаман тунлар,
Балки келар дея мен кутган кунлар,
Теграмда тинмайди бир дам қуюнлар,
Чидайман барига жим кулиб туриб.

Оллоҳим, тўғри йўл кўрсатгин менга,
Ёлбориб илтижо қиламан сенга,
Одамлар гийбатим қиларлар нега,
Чидайман барига жим кулиб туриб.

Омадли инсонга ҳасад қилмайман,
Ўзимга ҳам мудом омад тилайман,
Синов, заҳматларни кўзга илмайман,
Чидайман барига жим кулиб туриб.

Мундарижа

<i>Ватан</i>	3
<i>Тинчлик мадҳи</i>	4
<i>Яхшилар</i>	5
<i>Устозларга қўтлов</i>	6
<i>Болалик</i>	7
<i>Энди сизни</i>	8
<i>Бахтли бўлинг</i>	9
<i>Севги шарти</i>	10
<i>Кимни кутиб яшаяпсан</i>	11
<i>Орзу</i>	12
<i>Ёшсиз деманг</i>	13
<i>Бир кун</i>	14
<i>Гулим</i>	15
<i>Анҳор</i>	16
<i>Ахир нечун</i>	17
<i>Она-бала суҳбати</i>	18
<i>Қарамасанг, қаратаман</i>	19
<i>Юрак қолди</i>	20
<i>Марғилонлик қизлар</i>	21
<i>Дуст ҳақида</i>	22
<i>Дунё иши битмас</i>	23
<i>Бегона бўлдикми</i>	24
<i>Омад берсин</i>	25
<i>Оқшом</i>	26
<i>Ўзганинг чирोगи</i>	27
<i>Кўзларида ёш кўрмай</i>	28
<i>Баҳор завқи</i>	29
<i>Кулиб туриб</i>	30

Адабий-бадий нашр

ИЛҲОМ СОБИРОВ

БАХТЛИ БЎЛИНГ

Шеърлар

Мухаррир *А. Содиқов*

Техник муҳаррир *У. Жабборов*

Саҳифаловчи дизайнер *О. Фазилова*

Нашриёт лицензияси А1 № 162 . 08.14. 2009 й.

Теришга 30.05.2012 й. да берилди. Босишга рухсат 15.06.2012 й. да
этилди. Бичими 84x108 ¹/₃₂ Офсет босма «Times» гарнитураси
Шартли б.т. 2,25 Нашр-ҳисоб т. 2,0 Адади 1000 нусха.

Буюртма №34

«ФАРҶОНА» нашриёти.

150114, Фарғона шаҳри, Соҳибкирон Темур кўчаси. 28

«SIRIUS-MEDIA» МЧЖ босмаҳонаси

100100, Тошкент шаҳар, Бобур кўчаси 4

Лиц. № 10-2454. 2011 йил 16 май